

Drs. Mervin Wyatt Ras cu sosten di famia y sostenedonan

“Mi ta declara cu mi ta den partido AVP”



ORANJESTAD – Parlamentario independiente drs. Mervin Wyatt Ras despues di un periodo di evaluacion largo a dicidi di sigui den politica y uni su mes na partido Arubaanse Volkspartij (AVP) “E no tabata facil, e tabata un decision ‘tough’,” e Parlamentario a bisa den su prome conferencia como miembro di partido AVP. Pero, asina el a agrega, loke cu a hunga un rol importante, ta e apoyo cu el a ricibi di famia y amistadnan.

ANUNCIO

Sinta banda di lider di partido AVP Mike Eman, su esposo Trey Wyatt, su ruman homber Felipe y rondona pa un cantidad grandi di famia y sostenedonan, e parlamentario a anuncia cu e ta sigui den politica y den e partido berde.

E motibo cu tabatin asina hopi famia presente, el a bisa, tabata pasobra “nos ta un famia hopi cera cu otro, un famia grandi, cu semper a apoyami.” Famia, e politico a splica, ta hunga un rol ma-

sha importante den su bida, tanto den e aspecto personal como su trabou como politico. Pesey tambe cu e anuncio special aki a wordo haci na cas di su mayoman na Cura Cabay.

COMENTARIONAN

E tabata un momento un poco fastioso pa Parlamentario Wyatt Ras pa recorda cu su mama, kende semper tabata sper’e lanta te ora cu e yega cas despues di reunionnan largo den Parlamento, no tey mas cun’e.

Hustamente den e periodo aki despues di fayecimento di e pilar aki den su bida, e mester a soporta hopi insulto di e partido na cual e tabata pertenece te cu december 2010.

“Tur miembronan di mi famia mester a scucha insultonan mahos di mi partido,” tabata un di e comentarionan cu e politico a trece dilanti den su conferencia di prensa.

APOYO FAMILIAR

Pero tambe tabata masha importante cu den tur e turbu-

lencia cu el a pasa aden desde december 2010, ora cu el a apoya e “versoberingswet” cual ta pone Parlamentario y Ministernan bay cu pensioen na edad di 60 y no 45 y 55 aña, su famia a apoy’e. “Mi kier a gradici mi esposo, mi rumannan, mi tata y tur demas famia cu mester a scucha tur insulto y toch para fuerte banda di mi. Esaki a nifica masha hopi pami. E ta algo cu mi no por lubida y mi ta eternamente gradicido pa e apoyo aki,” un Mervin Wyatt Ras hopi emocional a expresa su mes bou aplauso di un gran cantidad di famia cu a logra yega na su conferencia di prensa. “Mi ta gradici cada un di boso aki cu a para banda di mi.”

CONVENCE

Na momento cu el a wordo aserca door di un miembro di Partido AVP, el a bisa cu e decision p’e no tabata facil, pasobra prome e mester a convence su rumannan, despues e demas famia, y tambe su campañadornan cu semper tabata MEP raha.

“Despues di esey, mi por bisa cu mi ta contento di ta sinta aki, pasobra mi meta ta pa representa pueblo.

Ami semper a haya famia masha importante mes, pesey nan ta cu mi aki cu mi”.

DECLARACION

Na final di e conferencia di prensa el a bisa “mi ta declara cu mi ta den e partido AVP ... Nos famia tin cu custumbra cu e color berde, por lo menos un parti pasobra tin un parti cu semper a keda AVP. E decision aki tambe a logra uni varios famia cu mi no a mira pa hopi tempo.

Mi ta yama nan bon-bini den famia, bon-bini den partido AVP pa nos contribui na gobernacion di pais Aruba, cu ta un reto grandi pa lider di partido.” Mervin Wyatt Ras hunto cu su esposo, ruman y demas famia a hisa e bandera berde na cas di su mayoman y despues hunto a cana yega Cas di Partido nobo di AVP na Savaneta unda tabatin un celebracion grandi. □

